



UKA 2013/117
8. oktober 2013
Sara Olsvig

Nunat Avannarliit isumaginninnikkut isumannaallisaaneq pillugu isumaqatigiissutaannut Kalaallit Nunaata akuerserusunneranik Namminersorlutik Oqartussat nalunaaruteqarnissaat pillugu Inatsisartut aalajangiiffigisassaattut siunnersuut. (Ilaqutariinnermut Inatsisinillu Atuutsitsinnermut Naalakkersuisoq)

Ukiut ingerlaneranni Nunani Avannarlerni inuiaqatigiit atugarissaarfiusut nunarsuarmi isumaginninnikkut nammaqatigiiffiunerpaanut ilaajuarput.

Kalaallit Nunaat taakkununga aamma akuuvoq. Taamaammat Nunat Avannarliit isumaginninnikkut isumannaallisaaneq pillugu isumaqatigiissutaannut Kalaallit Nunaata ilanngunneqartariaqarnera Inuit Ataqatigiinni nalornisiginngilarput, tassuuna kalaaleqatigut Nunat Avannarliit akornanni nuukkaluarlutik isumaginninnikkut ikiuutisiaqartuarnerat qulakkeerneqassammat.

Kalaallit Nunaata EU-mut EØS-imullu ilaasortaanginnera, aammalu Nunat Avannarliit isumaqatigiissutaata taanna kisiat aqutigalugu qulakkeerneqarsinnaanera, eqqarsaatigalugu isumaginninnikkut isumannaallisaaneq pillugu isumaqatigiissummut Kalaallit Nunaata akuerserusunneranik Namminersorlutik Oqartussat nalunaaruteqarnissaat tamakkiisumik ilalerparput.

Aalajangiiffigisassatut siunnersuut taperserparput aappassaaneerneqartinnanilu ataatsimiititaliamut suliarisassanngortillugu innersuussutigineqarnissaa pisariaqarsorinatigu.